





როგორ ვიყოთ კარბი მეობლები



როგორ ვიყოთ კარგი მარტლუბი რჩავაბი მარტლუბს

იყო მშობელი - ეს ბედნიერებაა. თუმცა, მშობლობა ყოველთვის ადვილი როდია, მით უმეტეს - კარგი მშობლობა! აქ მოყვანილი რჩევები შეიცავს თქვენთვის სასარგებლო ინფორმაციას პოზიტიური აღზრდის შესახებ და გაჩვენებთ, რატომ არის შვილის ფიზიკური დასჯა ნებისმიერ ასაკში ზიანის მომტანი მისთვისაც და თქვენთვისაც. გთხოვთ, იქონიეთ მოთმინება! საბოლოოდ აუცილებლად დაინახავთ, რომ თქვენი შვილები კარგად იქცევიან, თქვენ თავად ნაკლებ სტრესს განიცდით და თქვენი ოჯახური ცხოვრებაც უფრო ბედნიერია.

ამ რჩევებს გთავაზობთ საქართველოს საზოგადოებრივი ჯანდაცვის ფონდი, რომელიც ათეული წელია მუშაობს ბავშვთა დაცვის საკითხებზე. ვიმედოვნებთ, რომ რჩევების გაცნობით და გათვალისწინებით თქვენ შეძლებთ მეტი გაიგოთ საკუთარი თავის, თქვენი შვილის და კარგი მშობლობის შესახებ.



ყვალა მშობელი ერთნაირი როდის - თქვენ როგორ უმკლავდებით?

“მე მიყვარს ჩემი შვილები, მაგრამ მესმის, რომ მათ ვერ ექნებათ ყველაფერი და ისინი ვერ გააკეთებენ ყველაფერს, რაც მოესურვებათ“.

მშობლებმა იციან, რომ მათი მოვალეობაა, ასწავლონ შვილებს ოჯახში ქცევის წესები და ისიც აუხსნან, თუ რას მოელიან მათგან.

- გაქვთ ბავშვისთვის გასაგები, ნათელი და მარტივი წესები და მოელით, რომ თქვენმა შვილმა ეს წესები უნდა დაიცვას;
- შვილს გარკვეულწილად აკონტროლებთ, აუცილებელ შეზღუდვებს უწესებთ. ამასთან, არჩევანის თავისუფლებასაც აძლევთ, მისი ასაკისა და განვითარების დონის შესაბამისად;
- ძირითადად იყენებთ აღზრდის პოზიტიურ მეთოდებს და შვილის კარგი ქცევის წახალისებას ახდენთ. მისი ცუდი ქცევის გამო უკმაყოფილებას გამოხატავთ, მაგრამ არასდროს მიმართავთ დასჯის სასტიკ მეთოდებს.

**„შვილების აღზრდა - ეს
მუდმივი ბრძოლაა“.**

მშობლებმა უკეთ იციან. შვილებ-მა უსიტყვოდ უნდა დაუჯერონ.

- ბევრი მკაცრი წესი გაქვთ შემოღებული;
- უამრავი მოთხოვნა გაქვთ და მუქარას ხშირად იყენებთ;
- შვილის აღსაზრდელად მკაცრად დასჯის, ხშირი წამოთაქების მომხრე ხართ და ასეც იქცევით.



„მე უბრალოდ მშვიდი ცხოვრება მინდა“.

მშობლები წუხან, რამე ისე არ გააკეთონ, რომ შვილს აწყენინონ.

- საკუთარ საჭიროებებს ივიწყებთ და შვილის ყველა „სიცელქეზე“ თვალს ხუჭავთ, მათ შორის, არცთუ უმნიშვნელო ცუდ ქცევებზე;
- ყოველთვის უსრულებთ იმას, რის გამოც ჭირვეულობს;
- შვილის დამოუკიდებლობის წახალისებას არ ახდენთ და ყველაფერს მის წაცვლად აკეთებთ.

ადვილი შესაძლებელია, რომ თქვენ, გარემოებების შესაბამისად, სამივე ჩამოთვლილი შეხედულება და მათში მოაზრებული ნებისმიერი ქცევა გამოგიყენებიათ. თუმცა, გაითვალისწინეთ, რომ მშობლების პირველ ტიპს გაცილებით მეტი შანსი აქვს, რომ შვილებთან ერთად, ბედნიერები იყონ, მათ შვილებს ჩამოუყალი-ბდეთ კონსტრუქციული და კარგი ურთიერთობების უნარი, საკუთარი შესაძლებლობების რწმენა, თავდაჯერებულობა, პასუხისმგებლობა, სირთულეების დაძლევისა და პრობლემების მოგვარების, განსაცდელში საფრთხის თავიდან აცილების უნარები.



ყვალია შვილი ერთნაირი როდის - თქვანია შვილია ზუსტად იცის, როგორ გაბალიზიანოთ?

რომელი უფრო ახლოა თქვენი შვილისთვის?

- მშვიდი, ადვილად დამყოლი, სწრაფად ასრულებს იმას, რასაც ეუბნებით. თითქმის გამორიცხულია, რომ ის ოდესმე თქვენთან ბრძოლაში ჩაებას;
- ზოგჯერ გიჯერებთ და კარგად იქცევა, მაგრამ არის მომენტები, როდესაც გადაჭრით ახდენს თქვენი სურვილების და რჩევების იგნორირებას;
- ჩანარი გარეშე თითქმის არასდროს ასრულებს იმას, რასაც სთხოვთ. ყველაფერს „თავის ჭკუაზე“ აკეთებს.

არ არსებობს ორი ერთნაირი ბავშვი. დაბადებიდანვე ჩანს, რომ ყველა ჩვილი განსხვავებულია. ერთი მათგანის დამშვიდება და დაძინება ადვილია; მეორე - თქვენც გებრძვით და ძილსაც.



უკვე წამოზრდილი ბავშვები სიჭრელით კიდევ უფრო გამოირჩევიან. ზოგს პირველობა უყვარს და აღიარების ბუნებრივი მოთხოვნილება აქვს, ზოგი თავს არასრულფასოვნად გრძნობს, ზოგი სწავლაში ჩამორჩება, ზოგს - სუსტი ჯანმრთელობა აქვს, ზოგი - თავმოყვარეა და მცირე წარუმატებლობაზეც გამძაფრებულ მგრძნობელობას ავლენს...., ძალზე მორცხვი ან ურცხვი, ზოზინა ან ცეკვიტი, დინჯი ან ცანცარა, ყურადღებიანი ან დაბნეული, ზარმაცი ან ბეჯითი, ძალზე თავისებური - ეს იმ ეპითეტების მცირე ჩამონათვალია, რომლებითაც მშობლები თავიანთ შვილებს „ამკობენ“.

ყოველ მათგანს განსხვავებული მიღების ესაჭიროება.

კვლევებმა აჩვენა, რომ არსებობენ განსაკუთრებით „რთული“ ბავშვები. მშობლები ასეთებად მიიჩნევენ მეტად აქტიურ, ჯიუტ, „თავისნათქვამა“ შვილებს, რომლებიც ერთ ადგილზე ვერ ისვენებენ, ყველაფერს მშობლების ნათქვამის საპირისპიროდ აკეთებენ, სულ თამაშს და გართობას მოითხოვენ. ამან შეიძლება დამატებითი სირთულეები შეუქმნას მშობლებს, რომლებიც ცდილობენ კარგი მშობლობა გასწიონ.

გახსოვდეთ: ბავშვის ცალკეული ცუდი ქცევა არ ნიშნავს მის პიროვნულ „სიცუდეს“.

რა არის კარგი მშობლობა და პოზიტიური აღზრდა


ეს არის მეთოდები და მიღვომები, რომლებიც კარგად მუშაობს ნებისმიერ ბავშვთან, განურჩევლად მისი ასაკისა, ტემპერამენტისა, გამოცდილებისა, კულტურისა და ტრადიციებისა.

გაითვალისწინეთ, რომ თითოეულ ბავშვს განსხვავებულად უნდა მიუდგეთ. ამასთან, შვილების ზრდასთან ერთად, პოზიტიური აღზრდის წესებიც უნდა ცვალოთ. უცვლელი უნდა დარჩეს მხოლოდ

თქვენი დამოკიდებულება: უპირობოდ გიყვარდეთ თქვენი შვილი და მიიღეთ ის იმგვარი, როგორიც არის! წარმოიდგინეთ თავი ბავშვის ადგილას და ყველაფერი დანარჩენი მარტივი გახდება.

თუ კარგი მშობლობა გსურთ:

- ასაკის შესაბამისად, შვილთან თქვენი სიყვარული ფიზიკურა-დაც და სიტყვიერადაც გამოხატეთ: ხელში აიყვანეთ, მიიხ-უტეთ, მოეფერეთ, ალერსიანად მიმართეთ. ბავშვისთვის ამას სასიცოცხლო მნიშვნელობა აქვს;
- შეუთანხმდით ბავშვს იმაზე, თუ რას ელით მისგან. აუხ-სენით წესებისა და შეზღუდვების საფუძვლიანობა.
- იყავით თქვენი შვილისთვის მაგალითი. იგი ხომ ითვისებს და იმეორებს არა იმას, რასაც ეუბნებით, არამედ იმას, რასაც აკეთებთ;
- წაახალისეთ ბავშვი - შეაქეთ, როცა რაიმე კარგად გამოუვა და თქვენი სიხარულიც გამოხატეთ. ეცადეთ, შექება გაცილე-ბით სჭარბობდეს საყვედურებს;
- მოუსმინეთ შვილს, ოღონდ ნუ აიღებთ „ყოვლისმცოდნე მრჩევლის“ როლს. სერიოზულად მოეკიდეთ მის აზრებს და გრძნობებს;
- დაამშვიდეთ და გაამხნევეთ ბავშვი სტრესულ სიტუაციებში. ერთად განიხილეთ სირთულეების დაძლევის გზები.
- შეუთავსეთ ბავშვის დამოუკიდებლობა მის შესაძლებლობებს. ასევე, ერთმანეთთან შეათავსეთ დახმარების უზრუნველყო-ფა და დამოუკიდებლობის წახალისება.



არ საშინლად რატომ იქცევა?

ყურადღების მიპყრობა სურს. მშობლების ყურადღების მისაპყრობად ბავშვი ნებისმიერ ქცევას მიმართავს და ყველაზე მრავალფეროვან საშუალებებს იგონებს. ის შეიძლება თავსაც კი დაესხას იმათ, ვინც, მისი აზრით, „არაფრად ჩააგდო“ და ვინც მისი წილი ყურადღება მიისაკუთრა;

ძალაუფლების მოპოვებას ცდილობს. თუკი ყურადღების მიქცევის ეს მრავალფეროვანი ხერხები შედეგს არ მოიტანს, შესაძლოა, ბავშვმა ძალისმიერ საშუალებებს მიმართოს. ის იწყებს ფიქრს: “თუ ახლა ყურადღებას არავინ მაქცევს და სურვილებსაც არავინ მისრულებს, მე ვიქნები უფროსი და იმას გავაკეთებ, რაც მომეპრიანება. ბოლოს და ბოლოს, დიდები ხომ სწორედ ასე იქცევიან“.

შურს იძიებს. ბავშვი ვერ ხვდება, რატომ უწესებენ მშობლები და სხვა უფროსები ამდენ შეზღუდვას, ასე დაუინებით რატომ მოითხოვენ მისგან წესების დაცვას, რატომ აძლევენ ამდენ შენიშვნას. მან შეიძლება გადაწყვიტოს, რომ “ყველას უნდა, თავის ჭკუაზე ატაროს“ და შეეცდება, შური იძიოს - „ხურდა დაუბრუნოს“ დას, ძმას, მეგობარს, მშობლებს, - ყველას, ვინც, როგორც მას ჰგონია, ზღუდავს და უსამართლოდ ექცევა;



უბრალოდ, მოწყენილია. ხშირად ბავშვმა არ იცის, რით დასაქმდეს, როგორ გაერთოს. გარშემო კი ყველა დაკავებულია, მისთვის არავის სცალია, არავინ არაფერს სთავაზობს. სანამ გადამწყვეტ შეტევაზე გადავიდოდეს, გულგრილობის კედლის გადალახვას ბავშვი შედარებით უწყინარი ხერხებით ცდილობს: შეკითხვებს სვამს, ღილინებს, ბურთს ისვრის. პასუხად კი ესმის: „ნუ ხმაურობ“, „ხელს მიშლი“, „ხომ ხედავ, არ მცალია“... ასეთ დროს ბავშვები ხშირად სარგებლობენ ჰეროსტატეს მეთოდით: „შენ გულგრილი ხარ ჩემდამი? მე შენთვის მოსაწყენი ვარ? ძალიან კარგი! მე ნერვებს მოგიშლი და გაიძულებ, თუნდაც გძულდე!“.

თუკი ბავშვი იგრძნობს, რომ ამგვარმა საშუალებებმა წარმატებით იმუშავა, იგი შემდგომშიც მსგავსად მოიქცევა.

არასდროს შეაჯლოთ ბავშვი!

გაითვალისწინეთ - იმის მიხედვით, თუ როგორ უვლით ბავშვს ჩვილობაში, ის ხვდება, იმსახურებს თუ არა ნდობას გარემომცველი სამყარო. თუ მისი საჭიროებების დაკმაყოფილებაზე ზრუნავთ, მას ზრუნვითა და ყურადღებით ეკიდებით, - ბავშვს გარემომცველი სამყაროს შესახებ ექმნება შთაპეჭდილება, რომ ეს უსაფრთხო და ნდობის ღირსი სამყაროა. ხოლო თუ ბავშვს ყურადღებას არ აქცევენ და მის უსაფრთხოებაზე არ ზრუნავენ, იგი ცხოვრებისგან სწორედ ამის მიღებას სწავლობს და თვლის, რომ ეს სამყარო ნდობას არ იმსახურებს.

„ ჩემი შვილი გაუთავებლად ტირის! რას ვაკეთებ არასწორად?
- არაფერს. ტირილი ნორმალურია. ტირილით ბავშვი თქვენთან ურთიერთობს.

ტირილი ბავშვის ნორმალური განვითარების ნაწილია. ყველა ბავშვი განსხვავებულია, თუმცა ყოველი მათგანი ტირის. ტირილი მატულობს 2-4 თვის ბავშვებში. 5 თვიდან ბავშვის ტირილი საგრძნობლად იკლებს. თუ ყველაფერი სცადეთ ბავშვის დასამშვიდე-

ბლად და ის მაინც ტირის, ეს თქვენს ცუდ მშობლობაზე არ მიუთითობს.

გახსოვდეთ, სიტუაცია მოგვარებადია და მდგომარეობა აუცილებლად გაუმჯობესდება.

გამოიკვლიეთ ტირილის მიზეზები და სცადეთ ბავშვის დამშვიდება:

- შეამოწმეთ ჭირვეულობის, უგუნებობის მიზეზები: სველი საფენი, კბილების ამოჭრა, სიცხე, მოჭერილი სამოსი;
- შეიძლება, ბავშვს უბრალოდ შია;
- შესთავაზეთ „მატყუარა“;
- უმღერეთ ან ელაპარაკეთ;
- გაუკეთეთ მსუბუქი მასაჟი ზურგზე, მუცელზე;
- გაიყვანეთ სასეირნოდ;
- დაურეკეთ ექიმს, თუ ფიქრობთ, რომ ტირილის მიზეზი ავად-მყოფობაა.

გაითვალისწინეთ ეს რჩევე-ბი და არასდროს შეანჯლ-რიოთ ბავშვი. ეს ხშირად თავის ტვინის ან სხეულის სხვა ნაწილების მძიმე და-ზიანებას იწვევს, ზოგჯერ სასიკვდილოა!



კარბ ადამიანიდ შემთხვევით არავინ ყალიბდება

ბავშვის აღზრდა მოიცავს ურთიერთობის არა მარტო დადებით ასპექტებს, როგორიცაა: მოწონება, შექება, წახალისება, არამედ უარყოფითსაც: საყვედური, აკრძალვა, დასჯა. დასჯა და წახალისება აღმზრდელობითი პროცესის ერთგვარი ბერკეტებია.

წახალისება: მოვლენებს/ქმედებებს, რომლებიც ქცევის განმეორების ალბათობას ზრდიან, წახალისებებს ვუნიდებთ: ყოველგვარი მოწონება, შექება, ნდობის გამოხატვა, რომელთა დანიშნულებაა ბავშვის დადებითი ემოციების სტიმულირება.

დასჯა: ქმედებებს, რომლებიც ქცევის განმეორების ალბათობას ამცირებენ, დასჯას ვუნიდებთ. დასჯა არის ნებისმიერი საყვედური, გაფრთხილება, დაგმობა, რომელთა დანიშნულებაა ბავშვის ქცევის კორექცია განსაზღვრულ რთულ სიტუაციებში.

წახალისება ზემოქმედების ყველაზე მართებული საშუალებაა, რადგან ის ერთმნიშვნელოვნად მიუთითებს, თუ რომელი ქცევაა სასურველი, მაშინ როცა დასჯა მხოლოდ იმას განსაზღვრავს, თუ რომელი ქცევაა არასასურველი.

წახალისეთ კარგი ქცევა (სწრაფად და ხშირად):

- ღიმილით, სიტყვით, ხელის ალერსიანი შეხებით, როცა ის მონდომებით რეცხავს თავის თევზს, გაკვეთილებს ამზადებს, სიხარულით ეთამაშება უმცროს ძმას.
- აჩუქეთ ბავშვს საჩუქრები, მაგრამ ამასთან ასწავლეთ, როგორ მიიღოს ისინი, როგორ იყოს მადლიერი მის მიმართ გამოხატული ყურადღების ნებისმიერი ნიშნის მიმართ.

- 
- თუ ბავშვის წახალისება ფულით ხდება, თქვენ უნდა იცოდეთ, როგორ განკარგავს ბავშვი ამ თანხას, განიხილეთ ეს ბავშვთან ერთად.

წახალისება გაცილებით ეფექტურია, ვიდრე დასჯა. დადებითი ემოციების გამოწვევით, ის ხელს უწყობს პიროვნების დადებითი თვისებების ფორმირებას. სამწუხაროდ, უმეტესად ასე ხდება: როცა ბავშვი კარგად იქცევა, უფროსები მას ყურადღებას არ ვაქცევთ, ხოლო როცა ის ცუდად იქცევა - ვსჯით.

როგორ დავსაჯოთ სწორად?

დასჯა არ აღკვეთს დაუშვებელ ქცევას. უბრალოდ, ბავშვი თავის “დანაშაულში” უფრო ფრთხილი ხდება. ის უკეთ შლის კვალს, ადგილზე მისი წასწრება უფრო რთული ხდება. როცა ბავშვს სჯიან, ის ცდილობს უფრო ფრთხილი იყოს, და არა - უფრო პასუხისმგებელი.


- დასჯა არ უნდა ვნებდეს ჯანმრთელობას, არც ფიზიკურს, არც ფსიქიკურს;
- ბავშვის დასჯისას დარწმუნდით, რომ მან იცის, რისთვის ისჯება;
- ნებისმიერი დასჯისას ბავშვი დარწმუნებული უნდა იყოს, რომ ის უწინდებურად უყვართ;

- სასჯელი ჩადენილი საქციელის თანაბარზომიერი უნდა იყოს; ბავშვი ინფორმირებული უნდა იყოს იმის შესახებ, თუ მის რომელ საქციელს მოჰყვება სასჯელი და რა ფორმით, რათა არ დაიბნეს მოზრდილთა არათანმიმდევრული ქცევების გამო;
- ბავშვების ნებისმიერი დასჯისას ისინი არ უნდა იყვნენ მოკლებული თავიანთი ბიოლოგიური და ფიზიოლოგიური საჭიროებების დაკმაყოფილებას.

ბავშვი არ შეიძლება დაისაჯოს:

- ჭამის დროს, ძილის წინ;
- მაშინვე ფიზიკური ან სულიერი ტრავმის შემდეგ - წაქცევა, ჩხუბი, ცუდი ნიშანი სკოლაში, ნებისმიერი წარუმატებლობა);
- როცა ავადა ან მთლად არ გამოჯანმრთელებულა ავადმყოფობის შემდეგ;
- როცა რაღაც არ გამოსდის - როცა ნამდვილად ცდილობს და ვერ უმკლავდება შიშს, სიზარმაცეს, მოუსვენრობას, უყურადღებობას, ნებისმიერ სირთულეს;
- როცა ბავშვის საქციელის შინაგანი მოტივები თქვენთვის გაუგებარია;
- როცა თავად ვერ ხართ ხასიათზე - დაიღალეთ, გაწყენინეს, გაღიზიანებული ბრძანდებით.

დასჯაც და წახალისებაც ერთ საბოლოო მიზანს უნდა ემსახურებოდეს - შვილის კეთილდღეობას! ერთიც და მეორეც მშობლიური სიყვარულით და ზრუნვით უნდა იყოს ნაკარნახევი. დაეხმარეთ შეცდომის გაცნობიერებაში და გაუჩინეთ მისი გამოსწორების სურვილი.



უარი - ფიზიკურ დასჯას!

ალბათ ხშირად გაგიგონიათ - „მე მშობლები მცემდნენ, მაგრამ ცუდი ვარ?“, „ცემის გარეშე ბავშვები უკონტროლოები ხდებიან“ - კიდევ მრავალი ფართოდ გავრცელებული ფრაზა არსებობს, რომელიც ბავშვის ცემას ამართლებს. ბევრი მშობელი თვლის, რომ ცემა არის ბავშვის აღზრდის მნიშვნელოვანი „ინსტრუმენტი“. ამას ხშირად ის მშობლები ამბობენ, რომლებსაც ბავშვობაში ფიზიკურად სჯიდნენ.

სიმართლე კი ერთია - ფიზიკური დასჯა მშობლებისგან საჭიროებს ყველაზე ნაკლებ ჭკუას და უნარებს, ვიდრე ნებისმიერი სხვა აღმზრდელობითი ზომა. ხშირად მშობლები წამორტყმას, ყურის აწევას, თმის მოქაჩვას და ა.შ არ თვლიან ცემად, ფიზიკურ დასჯად, თუმცა ემოციური და ქცევითი თვალსაზრისით, მსგავს ქმედებას იგივე შედეგი მოჰყვება.



საფრთხე, რომლებიც ფიზიკურ დასჯას ახლავს:

- ბავშვები ტკივილთან ერთად გრძნობენ წყენას, სიბრაზეს და იღებენ ემოციურ ტრავმას; მოგვიანებით ეს აუცილებლად აისახება ოჯახურ ურთიერთობებზე;
- ბავშვის ცემით, წამოთაქებით, მას ასწავლით, რომ თქვენი ეშინოდეს; ბავშვები ითვისებენ ამ მოდელს და თავად სცემენ სხვა ბავშვებს, მოგვიანებით - საკუთარ შვილებს;
- ასაკის მატებასთან ერთად, ბავშვები სწავლობენ, როგორ აი-ცილონ ცემა, სწავლობენ ტყუილის თქმას და განცდების და-მალვას, რაც ის არ არის, რისი წახალისებაც მშობელს სურდა;
- ფიზიკური დასჯით ბავშვმა შეიძლება სერიოზული ტრავმა მიიღოს, რისი გამოსწორებაც ზოგ შემთხვევაში, შეუძლებე-ლია.

იმისათვის, რომ ბავშვის ფიზიკური დასჯა თავიდან აიცილოთ, ისწავლეთ საკუთარი რისხვის მართვა. თუ ფიქრობთ, რომ ბრაზის მართვა გიჭირთ:

- გადით სხვა ოთახში, გარეთ - სუფთა ჰაერზე; ისუნთქეთ ნელა და ღრმად, დაითვალეთ ათამდე - ეს ხშირად ხელს უწყობს რისხვის შემცირებას;
- უთხარით საკუთარ თავს - „არ დაკარგო კონტროლი, დამშვიდ-დი“;
- დაფიქრდით იმის შესახებ, თუ რატომ ხართ გაბრაზებული - ეს წამდვილად ბავშვის ბრალია, თუ სხვა რამ არის ამის მიზეზი;
- გაიხსენეთ რჩევები, რომელიც ბავშვის ქცევის მართვაში დაგეხმარებათ.

არსებობს უზარმაზარი დადებითი ძალა - ეს თქვენი შვილია! ამიტომ:

- გამხნევდით ... მოთმინება გამოიჩინეთ...
- გაამხნევეთ... შეაქეთ... იყავით გულწრფელი...
- ენდეთ...აღიარეთ...გიყვარდეთ...

იზრუნველი ჰავილის უსაფრთხოებაზე

არაფერია ადამიანის სიცოცხლეზე უფრო მნიშვნელოვანი, ხოლო ბავშვების სიცოცხლე - ყველაზე ღირებულია. ბავშვები ბუნებით უდარდელნი და მიმნდობნი არიან. მათ ყურადღება ადვილად ეფანტებათ და შეიძლება ვერ შეამჩნიონ შესაძლო საფრთხე. შვილის სიცოცხლეზე და ჯანმრთელობაზე ზრუნვა მშობლის უმთავრესი მოვალეობაა.

საფრთხის არიდება შესაძლებელია! ამისთვის საჭიროა, რომ თქვენმა შვილებმა სიტუაციის სწორად შეფასება და მართებული გადაწყვეტილებების მიღება ისწავლონ. ეს კი მხოლოდ თქვენი მუდმივი მხარდაჭერით, განმარტებებით, შეხსენებებით არის შესაძლებელი.



ბავშვის სიცოცხლის დასაცავად, ბავშვებმაც და მშობლებმაც უნდა იცოდნენ მარტივი, მაგრამ ძალიან სასარგებლო წესები, რომლებიც დაგეხმარებათ ბავშვებისთვის სახიფათო სიტუაციების არიდებაში.

გახადეთ სახლი უსაფრთხო:

ბავშვები მეტად ცნობისმოყვარენი არიან. ისინი გარემოს ხელებით, პირით, თვალებით სწავლობენ, სიამოვნებით ეხებიან და ებლაუჭებიან ყველაფერს, თუმცა ყოველთვის ვერ ხვდებიან რა არის მათთვის საზიანო. ეცადეთ დაინახოთ საცხოვრებელი გარემო შენი შვილის თვალებით. დააკვირდი, რა შეიძლება იყოს ბავშვისთვის საინტერესო, ხელმისაწვდომი, რა შეიძლება გახდეს ტრავმის მიზეზი.

- ბავშვები პატარა, მარტივი ნივთებით ინტერესდებიან და აგემოვნებენ მათ. გადამალეთ ყველა პატარა ნივთი, რაც შეიძლება ბავშვმა პირში ჩაიდოს და გადაყლაპოს;
- ბავშვისთვის მისაწვდომად არ დატოვოთ: წამლები, სარეცხი საშუალებები, ალკოჰოლი, ცხოველების საკვები, მცენარეები, ქიმიური ნივთიერებები და სხვა.
- ბავშვი ხშირად იღებს დამწვრობას ცხელი სითხის და ელექტრონული ტექნიკის საშუალებით. მიიღეთ უსაფრთხოების ზომები სამზარეულოში და აპაზანაში;
- ბავშვის საწოლი უსაფრთხო ადგილად აქციეთ: ბავშვის საწოლს არ უნდა ჰქონდეს ბასრი კიდეები, დაბალი მოაჯირი, ნაწილები, რომლებიც მარტივად ძვრება;
- არ დადგათ საწოლი ფანჯარასთან ახლოს, ორპირში, კედლის თაროს ქვემოთ, ელექტროჩამრთველთან ახლოს;
- საწოლში არ დატოვოთ რბილი ნივთები, რადგან ამან შეიძლება ბავშვის გაგუდვა გამოიწვიოს;
- ბავშვის საწოლი თქვენს საწოლთან ახლოს დადგით. როცა ძილს დააპირებთ, ბავშვი თავის საწოლში გადააწვინეთ. საწოლის გაზიარება ბავშვის გაგუდვის საფრთხეს ქმნის.

სათამაშოები

არ არის რეკომენდირებული:

- მცირე ზომის, მრგვალი, წვეტიანი სათამაშოები;
- სათამაშოები, რომლებსაც ახლავს ზონარი, თოკი ან მაგნიტი;
- სათამაშოები, რომლებსაც შეიძლება მოძვრეს პატარა ნაწილები;

ყიდვისას ყოველთვის შეამოწმეთ, ხომ არ შეიცავს სათამაშო ტოქსიურ ნივთიერებებს.



უსაფრთხოება მგზავრობისას

მანქანით უსაფრთხოდ და კომფორტულად ბავშვის მგზავრობისთვის საჭიროა, რომ 6 წლამდე ასაკის ბავშვმა სპეციალური საბავშვო სავარძლით იმგზავროს. სავარძლის შერჩევისას აუცილებლად გაითვალისწინეთ ბავშვის ასაკი, წონა და სიმაღლე.

- სასურველია, რომ ორ წლამდე ასაკის ბავშვი ჩასვათ ზურგით თქვენსკენ დამაგრებულ სავარძელში, რაც დაიცავს ბავშვის კისერს, თავს და ხერხემალს ტრავმისგან; მიიღეთ პროფესიონალის დახმარება და დარწმუნდით, რომ სავარძელი უსაფრთხოდ არის ჩამაგრებული;
- 12 წლამდე ასაკის ბავშვი არ დასვათ წინა სავარძელზე. ყოველთვის გამოიყენეთ უსაფრთხოების ღვედი;
- ბავშვი მანქანაში მარტო არასდროს დატოვოთ. ბავშვის სხეულის ტემპერატურა გადახურებული მანქანაში სწრაფად იზრდება, რაც მის ჯანმრთელობას საფრთხეს უქმნის;
- მგზავრობის დროს ღია კარი ან ფანჯარა ბავშვის გადავარდნის დიდ საფრთხეს წარმოადგენს.



უსაფრთხოება ქუჩაში:

- ბავშვს ასწავლეთ ქუჩის უსაფრთხო გადაკვეთის წესები, შუქნიშნის დანიშნულება;
- იარეთ ფეხით მოსიარულეთათვის განკუთვნილ გზის სავალ ნაწილზე. ქუჩაში ყოფნისას ბავშვს ხელი ჩასჭიდეთ;
- მიეცით მაგალითი, საგზაო მოძრაობის წესები არასდროს დაარღვიოთ.

მოწევა აკრძალულია იქ სადაც ბავშვია: თამბაქოს კვამლი შეიცავს ნიკოტინს, რომელიც უარყოფით ზეგავლენას ახდენს ბავშვის ფიზიკურ და ფსიქიკურ ჯანმრთელობაზე.

მშობლებს, მზრუნველებს ეკისრებათ ძირითადი პასუხისმგებლობა ბავშვის აღზრდასა და განვითარებაზე, ბავშვის ყველაზე ჭეშმარიტი ინტერესი წარმოადგენს მათი ზრუნვის მთავარ საგანს.

იზრუნეთ უსაფრთხოებაზე

დაარწმუნეთ თქვენი შვილი იმაში, რომ:

- როცა სახლში მარტოა, კარი არავის გაუღლოს, გამონაკლის შემთხვევაში - თქვენთან წინასწარი შეთანხმების გარეშე არასდროს შეუშვას სახლში უცნობი ადამიანი.
- არ გამოელაპარაკოს ქუჩაში უცნობ ადამიანს. განუმარტეთ, რას წიშნავს „სახითათო უცნობი“. ეს არის ადამიანი, რომელმაც შეიძლება ბავშვის მოტყუება სცადოს ან აიძულოს, რომ ცუდი რამეები გააკეთოს.
- სკოლიდან სახლში დაბრუნებისას, არ იაროს მარტო ან თანატოლებთან ერთად მათთვის უცნობ ქუჩებში, პარკებში, სკვერებში, განსაკუთრებით - შებინდებისას. დაეხმარეთ ბავშვს მარშრუტის ისე დაგეგმვაში, რომ მას არ მოუხდეს პოტენციურად სახითათო ადგილების გავლა.
- თუ ბავშვი უცნობისგან საფრთხეს გრძნობს, მან ხმამაღლა უნდა თქვას „არა“, უხმოს მშველელს, სწრაფად გაეცალოს. შემდეგ კი მან აუცილებლად უნდა გიამბოთ იმის შესახებ, რაც თავს გადახდა.

- ქუჩაში, ეზოებში, სადარბაზოებთან უსაფრთხო დისტანცია დაიჭიროს, თუკი საეჭვო ადამიანებს შენიშნავს, არ შეჩერდეს და რეაგირება არ მოახდინოს მათ პროვოკაციებზე.
- არავის აქებ ბავშვის პირად/ინტიმურ ადგილებზე შეხების უფლება. თუ ვინმე შეეცდება ინტიმურ ადგილებზე შეეხოს, ბავშვმა ხმამაღლა და მტკიცედ უნდა უთხრას მას “არა” და გაერიდოს. თუ ასეთი რამ მოხდება, მან ყოველთვის უნდა გიამბოთ ამის შესახებ.
- ინტერნეტსივრცეში აუცილებლად დაიცვას უსაფრთხო ქცევის წესები: უცხოს არავის მისცეს პირადი ინფორმაცია - სახელი, გვარი, მისამართი, ტელეფონის ნომერი, სკოლის ნომერი, არავითარ შემთხვევაში არ შეხვდეს ინტერნეტით გაცნობილ ადამიანს.
- სახლიდან გასვლისას ყოველთვის შეგატყობინოთ, სად და ვისთან ერთად მიდის, როგორ დაუკავშირდებით საჭიროების შემთხვევაში და სახლში როდის დაბრუნდება.

შეგიძლიათ უსაფრთხოების წესები ამობეჭდოთ და სახლში გამოსაჩენ ადგილას გააკრათ. ეს დაეხმარება თქვენს შვილს, დაიხსომოს და არ დაივიწყოს ისინი.

გვჯერა, თქვენ ყველაფერს გააკეთებთ იმისთვის, რომ თქვენს შვილს და ყველა სხვა ბავშვს მშვიდობიანი, უსაფრთხო, ბედნიერი ბავშვობა ჰქონდეს!

მშობლებმა კარგად უნდა გავიაზროთ, რომ ჩვენი ქცევის სტილი შვილებს გადაეცემა, რომლებიც, როცა გაიზრდებიან, საკუთარ შვილებზე მოახდენენ ზემოქმედებას. თუნდაც ამიტომ არ არის ოჯახში ბავშვზე ძალადობის პრობლემა მხოლოდ ერთეულების ან მხოლოდ მისი ოჯახის საქმე. ოჯახში ძალადობის ფაქტების დამალვით საფრთხე ექმნება ოჯახის ყველა წევრის (განსაკუთრებით ბავშვების) ფიზიკურ და ფსიქიკურ მდგომარეობას, მათ შემდგომ ცხოვრებას. პირველ რიგში, აუცილებელია გახსოვდეთ, რომ მსგავს შემთხვევებში კომპეტენტური დახმარების გაწევა შეუძლიათ ძალადობისაგან ბავშვთა დაცვის სფეროში მომუშავე პროფესიონალებს.

გისურვებთ ურთიერთგაგებას თქვენ და თქვენს შვილებს!

მომზადებულია Oak Foundation-ის ფინანსური მხარდაჭერით, პროექტის „თანამშომლობა ბავშვზე ძალადობის წინააღმდეგ“.

პუბლიკაცია მომზადებულია საქართველოს საზოგადოებრივი ჯანდაცვის ფონდის მიერ და მასში წარმოდგენილი მასალა არ გამოხატავს Oak Foundation -ის ოფიციალურ თვალსაზრისს. პუბლიკაციის შინაარსზე პასუხისმგებლობა ეკისრება საქართველოს საზოგადოებრივი ჯანდაცვის ფონდს.

პუბლიკაციაში გამოყენებული ლიტერატურა:

დავიცვათ ბავშვები ძალადობისგან - საკითხავი მასალა მშობლებისთვის, საქართველოს საზოგადოებრივი ჯანდაცვის ფონდი 2015 წელი;

Encouraging better Behaviour - a practical guide to positive parenting.
NSPCC, 2002

საქართველოს საზოგადოებრივი ჯანდაცვის ფონდი
ბავშვთა დახმარების ხაზი - 116 111

მისამართი: ქ. თბილისი, ედიშერ მაღალაშვილის ქუჩა №4, ბინა №1
ტელ: (995 32) 2 421 422; ტელ/ფაქსი: (995 32) 2 421 422

ელ. ფოსტა: info@phmdf.ge; ვებ.გვერდი: www.phf.org.ge

ფეისბუქი: <https://www.facebook.com/PublicHealthFoundationofGeorgia>

